

## Iðnaðar- og tækjadeild Skýrsla stjórnar á aðalfundi 2013

### Ágætu félagar!

Að venju verður á þessum aðalfundi farið yfir það helsta sem gerst hefur á liðnu starfsári. Haldnir hafa verið þrjár stjórnarfundir frá síðasta aðalfundi deildarinnar, sem haldinn var 16. febrúar 2012. Einnig var haldinn fundur með trúnaðarmönnum og trúnaðarráðsmönnum deildarinnar 3. desember sl. Á þeim fundi var fjallað um stöðu samningamála og unnið í hópavinnu til að fá svar við spurningunni: Á að segja samningum upp í janúar eða ekki? Skiptar skoðanir voru um það á meðal fundarmanna. Á fundinum var einnig farið yfir starfið í deildinni.

Ýmis mál voru til umfjöllunar á fundum stjórnar, m.a. var farið yfir samning við Becromal sem skrifað var undir 18. maí 2012. Mikið var fjallað um atvinnumál á svæðinu og einnig var fjallað um kjarakönnun félagsins sem framkvæmd var sl. haust í samstarfi við AFL starfsgreinafélag á austurlandi, en könnunin er sambærileg þeirri sem framkvæmd var árið 2011.

Í könnuninni var einnig spurt út í þjónustu félagsins og er útkoman ánægjuleg fyrir okkur. Um 56% sögðust hafa nýtt sér einhverja þjónustu hjá félaginu undanfarna 12 mánuði. 91,5% sögðust vera sáttir eða hvorki né við félagið og rúm 95% sögðust vera ánægð eða hvorki né með þjónustuna.

Félagið sendi bréf til allra trúnaðarmanna félagsins og hvatti þá til að halda vinnustaðafundi og nú þegar er búið að halda um 20 slíka fundi.

Í byrjun janúar hélt félagið fund þar sem fólk í trúnaðarstöfum fyrir félagið kom saman og ræddu hvað gera ætti í sambandi við uppsögn samninga. Ólafur Darri, hagfræðingur ASÍ, fjallaði þar um stöðu mála. Fundinn sátu á annað hundrað félagsmenn og í leynilegri atkvæðagreiðslu vildu 75% fundarmanna halda í samninginn. Hljóðið á fundinum var þannig að strax ætti að hefja undirbúning að nýjum samningi og mun vinna við það ferli hefjast strax á næstu vikum.

Framhaldsþing SGS fór fram þann 10. maí sl. Á þinginu voru samþykkt ný lög sambandsins þar sem umtalsverðar breytingar voru gerðar á stjórnskipulagi, hlutverki og starfsemi sambandsins. Að auki voru samþykktar fjórar nýjar reglugerðir sem er ætlað að styrkja starfsemina, efla upplýsingamiðlun SGS og skilgreina verkaskiptingu milli aðildarfélaganna og sambandsins. Á þinginu var Björn Snæbjörnsson,

formaður Einingar-Iðju, kjörinn formaður sambandsins og Hjördís Þ. Sigurbórsdóttir, formaður AFLs starfsgreinafélags, varaformaður. Félagið átti 18 fulltrúa á þinginu en alls sátu það 134 fulltrúar frá 18 aðildarfélögum.

40. þing ASÍ var haldið í Reykjavík 17. til 19. október sl. Tíu fulltrúar frá Einingu-Iðju sátu þingið sem bar yfirskriftina Atvinnu og velferð í öndvegi. Helstu áherslur þingsins voru atvinnu-, húsnæðis- og lífeyrismál, en auk þess voru tillögur að breytingum á lögum og reglugerðum ASÍ teknar til umfjöllunar.

Í nóvember þurfti í tvígang að fresta árlegum fræðsludegi félagsins vegna slæms veðurs. Búið er að ákveða að hann verði haldinn 15. mars nk. og vonandi verða veðurguðirnir okkur hliðhollir þá. Við munum verða á Rauðku á Siglufirði og hvet ég alla sem eru í trúnaðarstörfum fyrir deildina að taka daginn frá.

Í janúar var boðið upp á, í samstarfi við SÍMEY, náms og starfsráðgjöf á skrifstofum félagsins félagsmönnum að kostnaðarlausu. Ágætis þátttaka var, en vert er að minna á að félagsmenn geta hvenær sem er haft samband við ráðgjafana í SÍMEY og fengið hjá þeim ókeypis ráðgjöf.

Félagið stendur fyrir nokkrum námskeiðum á hverju ári, en frá síðasta aðalfundi hafa verið haldin trúnaðarmannanámskeið, dyravarðanámskeið, tölvunámskeið í samstarfi við SÍMEY, námskeið í austurlenskri matargerð, skrautkertagerð og fleira.

Sem dæmi um námskeið framundan má nefna dyravarðanámskeið, málað á steina (þá á ég samt ekki við Þorstein starfsmann deildarinnar). Einnig er í skoðun að halda starfslokanámskeið ásamt ýmsu sem er verið að vinna í.

Ef einhverjir eru með hugmyndir að námskeiðum sem þeir hafa áhuga á, er um að gera að koma því á framfæri við Önnu varaformann félagsins.

**Stjórn deildarinnar var þannig skipuð fyrir síðasta starfsár:**

Formaður	Ingvar Kristjánsson	Isavia
Varaformaður	Eyþór Karlsson	Sagaplast
Ritari	Sigurður Sveinn Ingólfsson	MS-Akureyri
Meðstjórnendur	Ingvar Sigurbjörnsson	Promens Dalvík
	Steindór Sigursteinsson	Norðurbik
	Sigurður Sigurðsson	SBA-Norðurleið
	Rannveig Kristmundsdóttir	Glófa
	Gunnar Magnússon	Hyrnu
	Tryggvi Kristjánsson	Skíðafélag Dalvíkur

**Fyrir næsta starfsár** verða eftirfarandi í stjórn til eins árs:

Varaformaður	Eyþór Karlsson	Sagaplast
Meðstjórnendur	Rannveig Kristmundsdóttir	Glófa
	Gunnar Magnússon	Hyrnu

Í ár verður kosið til tveggja ára um formann, ritara og 3 meðstjórnendur. Einnig þarf að kjósa einn meðstjórnanda til eins árs.

**Fyrir næsta starfsár gefa eftirtaldir kost á sér í stjórn til tveggja ára.**

Formaður	Ingvar Kristjánsson	Isavia
Ritari	Sigurður Sveinn Ingólfsson	MS-Akureyri
Meðstjórnendur	Ingvar Sigurbjörnsson	Promens Dalvík
	Steindór Sigursteinsson	Norðurbik
	Sigurður Sigurðsson	SBA-Norðurleið

Einnig þarf að kjósa einn meðstjórnanda til eins árs þar sem Tryggvi Kristjánsson er að vinna erlendis og hefur því ekki tæk á að sinna stjórnarstörfum. Í hans stað gefur kost á sér Vilhelm Adolfsson sem starfar hjá Becromal.

Ég vil minna fólk á að orlofsblaðið kemur væntanlega út 6. mars nk. Í sumar verður boðið upp á mikið úrval sumarhúsa eins og undanfarin ár.

Áfram verður boðið upp á Viku að eigin vali eins og það er kallað. Styrkurinn í ár hækkar um kr. 2.000 frá því í fyrra og verður að upphæð kr. 18.000. Sami fjöldi styrkja verða í boði fyrir félagsmenn og undanfarin ár, eða 200 styrkir. Sækja þarf um styrkinn eins og orlofshúsin, þ.e. fyrir 2. apríl nk. Í ár verður áfram boðið upp á niðurgreidd útilegukort og veiðikort á skrifstofum félagsins og einnig gistimiða á Fosshótelin og á Edduhótelin.

Ég vil einnig minna á félagavefinn okkar, sem veitir félagsmönnum möguleika á að skoða iðgjaldasögu sína, punktastöðu og punktásögu, greiðslusögu vegna bóta og styrkja og úthlutunarsögu vegna orlofshúsa.

Jafnframt býður félagavefurinn upp á að félagsmenn geti skoðað upplýsingar um stöðu orlofshúsa, sótt um, bókað og greitt fyrir orlofshús með greiðslukorti.

Ég vil minna á Afsláttarkort AN sem býður upp á góðan afslátt hjá Olís og ÓB ásamt fleiri fyrirtækjum. Unnið er við að semja við enn fleiri fyrirtæki. Trúnaðarmenn voru fengnir til að dreifa kortunum á vinnustaði en ef einhvern vantar kort þá er bara að líta við á einhverja af skrifstofum félagsins og ná í kort.

Að síðustu vil ég þakka öllum þeim sem ég hef starfað með á liðnu ári fyrir ánægjulegt samstarf og viðkynningu. Sérstaklega þakka ég fráfarandi stjórnarmanni, Tryggva Kristjánssyni, fyrir vel unnin störf í þágu félagsins.

Einnig vil ég þakka Þorsteini E. Arnórssyni, starfsmanni deildarinnar fyrir gott samstarf á árinu.